



Primijeno:	20-10-2025		
Org. jeb.	Kl. ozn.	Red. broj	Dr. odloga
01	04	2174/25	

Broj: 02-23-2140/25-AP-3
Datum: 20.10.2025. godine

GRADSKO VIJEĆE ZAVIDOVIĆI
n/r PREDSJEDAVAJUĆA GRADSKOG VIJEĆA
Hadžić dr. Amira, spec. radiolog

PREDMET: Prijedlog Odluke o izmjenama Odluke o nerazvrstanim
cestama na području općine Zavidovići, dostavlja se

U prilogu akta dostavljam Vam Prijedlog Odluke o izmjenama Odluke o nerazvrstanim
cestama na području općine Zavidovići.

Prijedlog Odluke o izmjenama Odluke o nerazvrstanim cestama na području općine
Zavidovići sa obrazloženjem gradonačelnice, dostavljam Gradskom vijeću Zavidovići radi
uvršćavanja u dnevni red 11. sjednice Gradskog vijeća.

Obzirom da se ne radi o obimnoj i složenoj Odluci predlažem da Gradsko vijeće
Zavidovići Prijedlog Odluke razmatra po skraćenom postupku bez Nacrta u skladu sa članom
130. stav (1) Poslovnika o radu Gradskog vijeća Zavidovići - novi prečišćeni tekst („Službeni
glasnik Grada Zavidovići“, broj: 7/2022 i 1/2023).

S poštovanjem


PO RJEŠENJU GRADONAČELNICE
broj: 02-04-3/25-AP-2 od 03.01.2025. godine
SEKRETAR GRADSKOG ORGANA
DRŽAVNE SLUŽBE

Dostavljeno:

1. Naslovu,
2. U spis.

Akt pripremila: F. Merdanović
(Fatima Merdanović)

Akt pregledao: N. Čahtarević
(Nermin Čahtarević)



Nermin Čahtarević, dipl. pravnik



Broj: 02-23-2140/25-AP-2
Datum: 20.10.2025. godine

Na osnovu člana 13. stav (2) Zakona o principima lokalne samoprave u Federaciji i Bosne i Hercegovini („Službeni glasnik BiH“, broj: 49/06 i 51/09), člana 2. stav (2), člana 4. stav (1) i (2) Zakona o cestama Federacije Bosne i Hercegovine („Službene novine FBiH“, broj: 12/10, 16/10 i 66/13) i člana 10. Privremene Statutarne Odluke Grada Zavidovići („Službeni glasnik Općine Zavidovići“, broj: 4/22), Gradsko vijeće Zavidovići na __. sjednici održanoj __. __. 2025. godine donijelo je

ODLUKU

o izmjenama Odluke o nerazvrstanim cestama na području općine Zavidovići

Član 1. (Usklađivanje)

U Odluci o nerazvrstanim cestama na području općine Zavidovići („Službeni glasnik Općine Zavidovići“, broj: 9/2017) u cijelom tekstu riječ „općine“ mijenja se sa riječi „grada“, riječ „općinskog“, mijenja se sa riječi „gradskog“, a riječi „Općinski načelnik“, mijenja se sa riječi „Gradonačelnik“, u odgovarajućem padežu.

Član 2. (Registar nerazvrstanih cesta)

Član 41. Odluke mijenja se i glasi:

„(1) Služba za upravu privrede, lokalni razvoj, infrastrukturu i međunarodnu saradnju će u roku od godinu dana od stupanja na snagu ove Odluke utvrditi Registar nerazvrstanih cesta na području Grada Zavidovići, koji će sadržavati pravac pružanja, objekte cestovne infrastrukture, broj katastarskih čestica, dužinu, širinu i karakteristike kolovoza.“

„(2) Registar nerazvrstanih cesta iz stava (1) ovog člana objavljuje se u „Službenom glasniku Grada Zavidovići.“

Član 3. (Stupanje na snagu)

Ova Odluka stupa na snagu prvog narednog dana od dana objavljivanja u „Službenom glasniku Grada Zavidovići“.

PREDSJEDAVAJUĆA
GRADSKOG VIJEĆA

Hadžić dr. Amira, spec. radiolog

OBRAZLOŽENJE

PRAVNI OSNOV ZA DONOŠENJE ODLUKE

Pravni osnov za donošenje ove Odluke sadržan je u sljedećem:

- Članom 13. stav (2) Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/09) određeno je:

„Vijeće u okviru svojih nadležnosti:

- obavlja i druge poslove utvrđene Zakonom i Statutom.“

- Članom 2. stav (2) Zakona o cestama Federacije Bosne i Hercegovine („Službene novine FBiH“, broj: 12/10, 16/10 - ispr. i 66/13) određeno je: „Ceste se dijele na javne i nerazvrstane.“

- Članom 4. stav (1) Zakona o cestama Federacije Bosne i Hercegovine („Službene novine FBiH“, broj : 12/10, 16/10-ispr. i 66/13) određeno je:

„Nerazvrstana cesta je površina koja se koristi za saobraćaj po bilo kojoj osnovi i koja je pristupačna većem broju korisnika.“

- Članom 4. stav (2) Zakona o cestama Federacije Bosne i Hercegovine („Službene novine FBiH“, broj: 12/10, 16/10 - ispr. i 66/13) određeno je:

„Izgradnja, korištenje, održavanje, zaštita i rekonstrukcija nerazvrstanih cesta, kao i poslovi nadzora na tim cestama uređuju se gradskim ili općinskim propisom, u skladu sa ovim Zakonom.“

U članu 10. stav (1) tačka 2. Privremene Statutarne Odluke Grada Zavidovići („Službeni glasnik Općine Zavidovići“, broj: 4/22) propisano je: „Gradsko vijeće u okviru svoje nadležnosti donosi odluke i druge opće akte kojima uređuje pitanja iz samoupravnog djelokruga Grada.“

RAZLOZI DONOŠENJA ODLUKE

Postojećom Odlukom o nerazvrstanim cestama na području općine Zavidovići („Službeni glasnik Općine Zavidovići“, broj: 10/21), u članu 41. propisano je da će Općinski načelnik nakon usvajanja Odluke o nerazvrstanim cestama, na prijedlog nadležne Službe utvrditi spisak nerazvrstanih cesta na području općine Zavidovići.

Imajući u vidu da nije dovoljno da se utvrdi samo spisak nerazvrstanih cesta, nego je potrebno utvrditi Registar nerazvrstanih cesta, koji će sadržavati pravac pružanja, objekte cestovne infrastrukture, broj katastarskih čestica, dužinu, širinu i karakteristike kolovoza, predlažem donošenje navedene Odluke.

Smatram da predmetna Odluka nije obimna i složena s toga predlažem da Gradsko vijeće Zavidovići Prijedlog Odluke razmatra po skaćenom postupku bez Nacrta u skladu sa članom 130. stav (1) Poslovnika o radu Gradskog vijeća Zavidovići - novi prečišćeni tekst („Službeni glasnik Grada Zavidovići“, broj: 07/2022 i 01/2023).

ODREDBE KOJE SE MIJENJAJU

Član 41.

(Spisak nerazvrstanih cesta)

(1) Općinski načelnik će na prijedlog Službe za upravu ekonomskih poslova i poduzetništva u roku od 60 dana od dana stupanja na snagu ove Odluke utvrditi spisak nerazvrstanih cesta na području općine Zavidovići.

(2) Spisak iz prethodnog stava objavit će se u „Službenom glasniku Općine Zavidovići“.

OBRAZLOŽENJE FINANSIJSKIH SREDSTAVA ZA
PROVOĐENJE ODLUKE I FINANSIJSKI EFEKTI ODLUKE

Za provođenje ove Odluke nisu potrebna finansijska sredstva.

PO RJEŠENJU GRADONAČELNICE
broj: 02-04-3/25-AP-2 od 03.01.2025. godine
SEKRETAR GRADSKOG ORGANA
DRŽAVNE SLUŽBE

Nermin Čahtarević, dipl. pravnik

Akt pripremila: _____
(Amira Šibonjić)

Akt pregledao: _____
(Almir Mustafić)

Akt pregledala: _____
(Džeraldina Miličević)

Akt pregledao: _____
(Nermin Čahtarević)

OT / PR
02-

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI
Služba za upravu privrede, lokalni razvoj,
infrastrukturu i međunarodnu saradnju



BOSNA I HERCEGOVINA FEDERACIJA BOSNE I HERCEGOVINE ZENIČKO-DOBOJSKI KANTON GRAD ZAVIDOVIĆI STUČNA SLUŽBA GRADONAČELNIKA			
Primljeno:		15-10-2025	
Org. jed.	Xi. odj.	Pos. broj	Pos. prijava
02	23	2940/25	

Broj: 03-45-10/25-446
Datum: 14.10.2025.godine

Gradonačelnica
-ovdje-

PREDMET: Prijedlog Odluke o izmjenama i dopunama Odluke o nerazvrstanim cestama
dostavlja se

U prilogu akta dostavljamo Vam Prijedlog Odluke o izmjenama i dopunama
Odluke o nerazvrstanim cestama na razmatranje.

S poštovanjem!

Dostavljeno:

- Naslovu
- a/a



I-AKTI OPĆINSKOG VIJEĆA
BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
OPĆINSKO VIJEĆE



Broj: 01-27-2395/17-AP-12

Datum: 31.10.2017. godine

Na osnovu člana 13. stav 2. Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/09), člana 4. stav 2. Zakona o cestama Federacije Bosne i Hercegovine („Službene novine FBiH“, broj: 12/10, 16/10 i 66/13) i člana 25. stav 1. tačka 2. Statuta Općine Zavidovići („Službeni glasnik Općine Zavidovići“, broj: 5/2008 i 5/a/2008) Općinsko vijeće Zavidovići na 13. sjednici, održanoj 31.10.2017. godine donijelo je

O D L U K U
O NERAZVRSTANIM CESTAMA NA PODRUČJU OPĆINE
ZAVIDOVIĆI

I - OPĆE ODREDBE

Član 1.

(Predmet i obim primjene)

Ovom Odlukom uređuje se upravljanje, izgradnja, rekonstrukcija i sanacija, održavanje, zaštita, korištenje, uređenje saobraćaja, finansiranje i poslovi nadzora na nerazvrstanim cestama na području općine Zavidovići.

Član 2.

(Definicija pojma)

(1) Nerazvrstana cesta je površina koja se koristi za saobraćaj po bilo kojoj osnovi i koja je pristupačna većem broju korisnika, a nije svrstana ni u jednu kategoriju javnih cesta.

(2) Nerazvrstana cesta je vlasništvo Općine Zavidovići i kao takva uplanjena u katastru nekretnina.

(3) O namjeni dijelova nerazvrstane ceste, koja nakon izgradnje ili rekonstrukcije ne pripada novoj trasi, odlučuje Općinsko vijeće na prijedlog nadležnog organa za rješavanje imovinsko-pravnih odnosa i mišljenje inspektora za ceste.

Član 3.

(Sastav ceste)

(1) Nerazvrstanu cestu čini:

- cestovna građevina (gornji i donji stroj ceste),
- cestovno zemljište koje pripada cesti,
- vazdušni prostor iznad kolovoza u visini do 7 m,
- cestovni građevinski objekti (mostovi, propusti, nadvožnjaci, podvožnjaci, nathodnici, pothodnici, potporni i obložni zidovi, nasipi, i sl.),
- građevine za odvodnju i pročišćavanje vode,
- saobraćajne površine uz kolovoz (pješačke staze neposredno uz kolovoz ili odvojene od kolovoza, autobuska stajališta i okretišta),

- saobraćajna signalizacija (horizontalna i vertikalna saobraćajna signalizacija, instalacije i javna rasvjeta u funkciji saobraćaja, svjetlosno-signalni uređaji, oprema parkirališta, odmorišta i sl.),

- oprema ceste (snjegobrani, vjetrobrani, zaštite od obrušavanja i nanosa, zaštitne i sigurnosne ograde, odbojnici i sl.).

Zaštitni pojas nerazvrstane ceste je 1,0 m od vanjskog ruba katastarski uplanjene ceste s obje strane gdje se ne mogu graditi objekti ili građevine, osim ako odredbama ove Odluke ili Zakonom nije propisano drugačije.

II - UPRAVLJANJE NERAZVRSTANIM CESTAMA

Član 4.

(Nadležnost)

Općina Zavidovići putem Službe za upravu ekonomskih poslova i poduzetništva kao upravitelja nerazvrstanih cesta na području općine Zavidovići (u daljem tekstu upravitelj) vrši:

- poslove izgradnje, rekonstrukcije, održavanja i zaštite nerazvrstanih cesta,
- stvara uslove za normalno korištenje i provođenje mjera zaštite nerazvrstanih cesta,
- privremeno zabranjuje ili ograničava odvijanje saobraćaja na nerazvrstanoj cesti ili dijelu nerazvrstane ceste zavisno od stanja ceste, izvođenje radova i mogućnosti obavljanja saobraćaja,
- vodi evidenciju (bazu podataka) nerazvrstanih cesta,
- daje saglasnosti za izvođenje radova u pojasu nerazvrstanih cesta,
- priprema planove i programe izgradnje, rekonstrukcije, održavanja i zaštite nerazvrstanih cesta.

III - IZGRADNJA, REKONSTRUKCIJA I SANACIJA NERAZVRSTANIH CESTA

Član 5.

(Ustupanje poslova)

Općinski načelnik poslove izgradnje, rekonstrukcije i održavanja nerazvrstanih cesta ustupa u skladu sa odredbama Zakona o javnim nabavkama („Službeni glasnik BiH”, broj: 39/14).

Član 6.

(Održavanje cesta)

Izgradnja, rekonstrukcija, sanacija i održavanje nerazvrstanih cesta vrši se u skladu sa pravilima struke i procjenama opravdanosti.

Član 7.

(Planiranje radova)

Planiranje radova na nerazvrstanim cestama vrši se u skladu sa planom i programom koji na prijedlog Općinskog načelnika donosi Općinsko vijeće Zavidovići.

Član 8.

(Izgradnja, rekonstrukcija i sanacija)

(1) Pod izgradnjom nerazvrstanih cesta u smislu ove Odluke smatra se izgradnja nerazvrstanih cesta po pretežno novoj trasi, a obuhvata: građevinsko projektovanje i drugo projektovanje sa istražnim radovima, projektovanje opreme, pratećih objekata, saobraćajne signalizacije i drugo projektovanje, otkup zemljišta i objekata, premještanje komunalne infrastrukture, pribavljanje odobrenja za građenje, ustupanje radova građenja, organizaciju stručnog nadzora i kontrole ugrađenih materijala i izvedenih radova, tehnički pregled i primopredaju na korištenje i upravljanje nerazvrstanih cesta i objekata.

(2) Pod rekonstrukcijom nerazvrstane ceste u smislu ove Odluke smatraju se radovi na

dijelu postojeće ceste kojim se mijenjaju njene tehničko-građevinske karakteristike i konstruktivni elementi sa ciljem povećanja kapaciteta ceste i poboljšanja uslova saobraćajnih usluga.

(3) Izgradnja i rekonstrukcija nerazvrstanih cesta se izvodi na osnovu tehničke dokumentacije izrađene od ovlaštenog pravnog lica.

(4) Pod sanacijom nerazvrstanih cesta u smislu ove Odluke podrazumijevaju se radovi kojima se poboljšava sigurnost učesnika u saobraćaju i održavanje nerazvrstanih cesta.

(5) Sanacija nerazvrstanih cesta se može izvesti bez tehničke dokumentacije izrađene od ovlaštenog pravnog lica, projekta i građevinske dozvole.

Član 9.

(Širina kolovoza)

(1) Minimalna širina kolovoza nerazvrstane ceste koja se izgrađuje je 4,50 m za dvosmjerni saobraćaj i 3,0 m za jednosmjerni saobraćaj sa konstrukcijom koja podnosi osovinsko opterećenje od 10 t, a u opravdanim slučajevima minimalno osovinsko opterećenje od 6 tona, što se obilježava saobraćajnim znakom.

(2) Na postojeće izgrađene nerazvrstane ceste, čija je minimalna širina manja od širine određene u stavu (1) ovog člana, navedeni stav se neće primjenjivati.

Član 10.

(Slobodan prostor)

Iznad cijele širine kolovoza nerazvrstane ceste mora biti slobodan prostor od najmanje 7,0 m.

Član 11.

(Izrada tehničke dokumentacije)

(1) Ako je prilikom izgradnje nerazvrstane ceste planirana i izgradnja komunalnih, vodoprivrednih i drugih objekata, tehnička dokumentacija mora obuhvatiti i te objekte i radove koji se planiraju izvesti.

(2) Troškove izrade tehničke dokumentacije i izgradnje objekata iz stava 1. ovog člana snosi investitor planiranih objekata i radova.

Član 12.

(Premještanje instalacija)

(1) U slučaju rekonstrukcije nerazvrstane ceste i vršenja radova koja iziskuju premještanje postojećih instalacija u cestovnom pojasu, vlasnici tih instalacija su dužni o svom trošku izmjestiti te instalacije odnosno prilagoditi ih nastalim promjenama.

(2) Investitor radova na rekonstrukciji ceste dužan je najmanje tri mjeseca ranije obavijestiti vlasnika instalacija o početku radova na rekonstrukciji nerazvrstane ceste i omogućiti mu uvid u tehničku dokumentaciju, ali nije obavezan pribavljati saglasnost vlasnika postojećih instalacija, osim u slučajevima kada to zahtijevaju posebne okolnosti.

(3) U slučaju da vlasnik instalacija ne izvrši obavezu iz prethodnog stava, investitor radova na rekonstrukciji nerazvrstane ceste će izvršiti premještanje postojećih instalacija o trošku vlasnika instalacija.

(4) U slučaju preusmjeravanja saobraćaja na nerazvrstanu cestu radi izvođenja radova na javnoj cesti, upravitelj javne ceste je dužan po okončanju radova i uspostavljanju saobraćaja na javnoj cesti, u što kraćem roku otkloniti nastala oštećenja na nerazvrstanoj cesti radi dovođenja nerazvrstane ceste i saobraćaja u ispravno stanje.

(5) Troškove održavanja u vrijeme preusmjeravanja saobraćaja i otklanjanje oštećenja snosi investitor koji je tražio preusmjeravanje saobraćaja.

(6) Odobrenje za preusmjeravanje izdaje Služba za upravu ekonomskih poslova i poduzetništva.

-855-

Član 13.

(Mjere osiguranja)

Na mjestu ukrštanja nerazvrstane ceste sa željezničkom prugom moraju se preduzeti mjere osiguranja propisane Zakonom o osnovama sigurnosti saobraćaja na cestama u Bosni i Hercegovini („Službeni glasnik BiH”, broj: 6/06, 74/06, 44/07, 84/09, 48/10, 18/13 i 8/17) i Zakonom o sigurnosti željezničkog prometa („Službeni list R BiH”, broj: 33/95).

IV - ODRŽAVANJE NERAZVRSTANIH CESTA**Član 14.**

(Održavanje cesta)

Pod održavanjem nerazvrstanih cesta u smislu ove Odluke smatra se izvođenje radova kojima se osigurava nesmetan i siguran saobraćaj i očuvanje projektovanog stanja ceste.

Član 15.

(Poslovi održavanja)

Poslovi održavanja nerazvrstanih cesta su:

1. poslovi redovnog održavanja i
2. poslovi vanrednog održavanja.

Član 16.

(Redovno održavanje)

(1) Redovno održavanje čini skup mjera i radnji koje se obavljaju tokom većeg dijela ili cijele godine na nerazvrstanim cestama uključujući i sve objekte i instalacije sa svrhom održavanja prohodnosti i sigurnosti saobraćaja na njima.

(2) Poslovi redovnog održavanja nerazvrstanih cesta obuhvataju:

- popravak kolovoza, trupa ceste, potpornih i obložnih zidova i objekata na cesti,
- saniranje udarnih rupa na kolovozu,
- čišćenje kolovoza i objekata za odvodnju,
- održavanje bankina, kosina nasipa, usjeka i zasjeka,
- zamjena i popravak saobraćajne signalizacije i ostale opreme na cesti,
- izvođenje poslova u svrhu održavanja preglednosti ceste i znakova,
- košenje trave i održavanje zelenih površina u cestovnom pojasu,
- čišćenje snijega sa kolovoza i autobuskih stajališta,
- posipanje kolovoza u slučaju poledice,
- obavljanje drugih poslova kojima se osigurava stalan i siguran saobraćaj na nerazvrstanim cestama.

(3) Dio održavanja se može odobriti mjesnoj zajednici za izvođenje radova angažovanjem građana (akcije ili slično).

(4) Pravno lice i mjesne zajednice sa moraju pridržavati ugovorenih ili odobrenih obaveza i uslova.

(5) Svaki građanin, pravno ili fizičko lice mogu učestvovati i izvoditi radove redovnog održavanja vlastitim sredstvima, kao i druge radove na održavanju, poboljšanju kvaliteta cesta i uslova saobraćaja, uz prethodnu saglasnost upravitelja ceste.

(6) Nadzor nad provođenjem radova izvodit će Inspektor za ceste u skladu sa zakonskim propisima, saglasnosti iz stava (5) ovog člana i odredbama ove Odluke.

Član 17.

(Vanredno održavanje)

(1) Vanredno održavanje nerazvrstanih cesta obuhvaća obimnije radove koji se izvode u cestovnom pojasu i samo na osnovu tehničke dokumentacije i bez pribavljanja saglasnosti i druge dokumentacije prema Zakonu o prostornom uređenju i građenju („Službene novine ZE-

DO kantona", broj: 1/14 i 4/16).

(2) Poslovi vanrednog održavanja nerazvrstanih cesta obuhvataju:

- obnavljanje, zamjenu i ojačavanje dotrajalih kolovoza,
- obnavljanje potpornih zidova,
- ojačavanje i zamjenu propusta,
- ojačavanje mostova i zaštitu čelične konstrukcije,
- izradu pješačkih staza i ugrađivanje ivičnjaka,
- saniranje klizišta i odrona,
- obavljanje drugih obimnijih poslova koji ne spadaju u redovno održavanje.

(3) Dio održavanja se može odobriti mjesnoj zajednici za izvođenje radova angažovanjem građana (akcije ili slično).

(4) Pravno lice i mjesne zajednice sa moraju pridržavati ugovorenih ili odobrenih obaveza i uslova.

(5) Svaki građanin, pravno ili fizičko lice mogu učestvovati i izvoditi radove vanrednog održavanja vlastitim sredstvima, kao i druge radove na održavanju, poboljšanju kvaliteta cesta i uslova saobraćaja, uz prethodnu saglasnost upravitelja ceste.

(6) Inspektor za ceste će rješenjem zabraniti radove iz stava (5) ovog člana, ukoliko su u suprotnosti sa potrebama ceste, zakonskim propisima, saglasnosti i propisima ove Odluke.

Član 18.

(Uslovi vanrednog održavanja)

Radovi vanrednog održavanja nerazvrstanih cesta se mogu izvoditi samo na osnovu tehničke dokumentacije u skladu sa Zakonom o prostornom uređenju i građenju.

Član 19.

(Povjeravanje održavanja)

(1) Poslovi redovnog i vanrednog održavanja nerazvrstanih cesta povjeravaju se pravnom licu po postupku i na način predviđen Zakonom o javnim nabavkama.

(2) Izabrano pravno lice radove izvodi u skladu sa ugovorom kojim se regulišu vrsta radova koji su predmet ugovora, period na koji se ugovor zaključuje, ugovorena vrijednost radova, obaveze izvršioca radova, obaveze naručioca radova, stručni nadzor nad izvođenjem radova, odgovornost za eventualno prouzrokovane štete, način rješavanja nesuglasica i sporova, te ostala pitanja od važnosti za izvršavanje radova na održavanju nerazvrstanih cesta.

Član 20.

(Održavanje revizijskih okana)

Održavanje revizijskih okana komunalnih instalacija i svih vrsta uređaja postavljenih unutar cestovnog pojasa nerazvrstane ceste dužan je provoditi vlasnik instalacija i uređaja.

Član 21.

(Odvijanje saobraćaja u vrijeme održavanja)

(1) Radovi na održavanju nerazvrstane ceste se trebaju izvoditi tako da se zbog njih ne obustavlja saobraćaj.

(2) U slučaju da planirani radovi zahtijevaju obustavljanje saobraćaja, Općinski načelnik putem Službe za upravu ekonomskih poslova i poduzetništva, na zahtjev izvođača radova, ocjenjuje opravdanost zahtjeva i izdaje odobrenje za obustavljanje saobraćaja i/ili izmjenu režima saobraćaja na nerazvrstanoj cesti.

(3) U izdatom odobrenju izvođaču se nalaže i postavljanje dopunske saobraćajne signalizacije i eventualno preduzimanje ostalih radnji potrebnih za sigurno odvijanje saobraćaja.

(4) Ukoliko se radovi na održavanju nerazvrstane ceste koji iziskuju izmještanje saobraćaja izvode na dijelu nerazvrstane ceste gdje ne postoji mogućnost izmještanja

saobraćaja, u odobrenju se može naložiti da se radovi izvode noću.

(5) U izdatom odobrenju izvođaču se nalaže da nakon završetka radova ukloni dopunsku saobraćajnu signalizaciju i nerazvrstanu cestu dovede u stanje za neometano odvijanje saobraćaja.

V - ZAŠTITA I KORIŠTENJE NERAZVRSTANIH CESTA

Član 22.

(Zaštita nerazvrstane ceste)

Pod zaštitom nerazvrstane ceste u smislu ove Odluke podrazumijeva se:

- zaštita cesta od prekomjernog opterećenja,
- zaštita ceste od prekoračenja ukupne mase i osovinskog opterećenja,
- sprečavanje vršenja bespravnih radnji i gradnje u cestovnom pojasu,
- sprečavanje vršenja radnji na cesti i u cestovnom pojasu kojima bi se mogla oštetiti cesta, odnosno ugroziti saobraćaj ili povećati troškovi održavanja nerazvrstane ceste,
- osiguranje preglednosti na raskrsnicama i krivinama,
- regulisanje odnosa sa vlasnicima zemljišta uz pojas ceste,
- sprečavanje deponovanja materijala na cestu ili uz cestu,
- regulisanje postavljanja kablova, vodova i instalacija u trupu ceste u cestovnom pojasu,
- regulisanje odvodnje, prekopavanja cestovnih i odvodnih kanala,
- regulisanje postavljanja i dopunjavanja saobraćajne i turističke signalizacije,
- regulisanje postavljanja reklamnih znakova,
- evidentiranje cesta, cestovnog pojasa, saobraćajne signalizacije i opreme na cestama,
- obaveza ugovaranja održavanja i zaštite cesta,
- regulisanje ograničenja i obustave saobraćaja,
- regulisanje gradnje prilaza,
- zaštita od nekontrolisanog izlaska većeg broja ljudi, djece, stoke i divljači na cestu,
- uklanjanje pokvarenih, napuštenih i oštećenih vozila sa ceste ili cestovnog pojasa,
- vršenje drugih radnji u svrhu zaštite nerazvrstanih cesta.

Član 23.

(Opterećenje ceste)

(1) Vozila na nerazvrstanoj cesti moraju ispunjavati određene uslove u smislu dozvoljenih dimenzija, ukupne mase i osovinskog opterećenja.

(2) Prekomjerno opterećenje nerazvrstane ceste podrazumijeva njenu upotrebu iznad vrijednosti saobraćajnog opterećenja za koju je cesta projektovana odnosno građena nastalu zbog obavljanja djelatnosti pravnih i fizičkih lica uz nerazvrstanu cestu.

(3) Pod povećanjem saobraćajnog opterećenja iz stava (2) ovog člana u smislu prekomjerne upotrebe, smatra se učestalo saobraćanje teretnih vozila sa teretom po istim dionicama nerazvrstane ceste.

(4) Pod djelatnostima iz stava (2) ovog člana kod kojih može doći do prekomjernog opterećenja nerazvrstane ceste smatra se: izgradnja infrastrukturnih i drugih objekata, proizvodnja odnosno eksploatacija energetskih mineralnih sirovina ili drugih prirodnih materijala, preusmjeravanje saobraćaja zbog zatvaranja javne ceste na duže od 10 dana na nerazvrstanu cestu.

(5) Ako se nerazvrstana cesta koristi na način da dolazi do prekomjernog saobraćajnog opterećenja pravna ili fizička lica koja je na taj način koriste su dužna podnijeti zahtjev za izdavanje odobrenja za prekomjernu upotrebu nerazvrstane ceste, te platiti naknadu za prekomjerno opterećenje.

(6) Zahtjev za izdavanje odobrenja sadržava:

- opis djelatnosti korisnika,

-858-

- podatke o planiranoj količini tereta koji će se prevoziti nerazvrstanom cestom,
- kartu cestovne mreže sa ucrtanim itinererima,
- izjava o plaćanju naknade ili preuzimanje obaveze održavanja ceste u ispravnom stanju o vlastitom trošku, angažovanjem registrovanog društva za održavanje cesta,
- rješenje nadležnog organa kojim je odobreno obavljanje navedene djelatnosti.

(7) Naknada za prekomjerno opterećenje nerazvrstane ceste obračunava se na osnovu elaborata ili projekta prekomjernog oštećenja kojim se procjenjuju oštećenja na cesti zbog prekomjernog opterećenja.

(8) Odobrenje za prekomjerno opterećenje izdaje upravitelj cesta.

Član 24.

(Ograđivanje zemljišta uz cestu)

(1) Ako se pored nerazvrstane ceste nalazi prostor gdje se okuplja veći broj ljudi (sportska, dječija igrališta i sl.) ili zemljište na kojem se zadržavaju životinje (pašnjaci, ekonomska dvorišta i sl.) vlasnik, odnosno korisnik toga zemljišta dužan je taj prostor i zemljište ograditi na dijelu koji se proteže uz nerazvrstanu cestu.

(2) Ograda iz stava (1) ovog člana postavlja se i održava tako da spriječi mogućnost direktnog dolaska ljudi i životinja s tih prostora i zemljišta na nerazvrstanu cestu.

Član 25.

(Zabrana oštećenja ceste)

Zabranjeno je preduzimati bilo kakve radove ili radnje na nerazvrstanoj cesti i cestovnom pojasu ako bi ti radovi odnosno radnje mogli oštetiti nerazvrstanu cestu, povećati troškove održavanja odnosno ugrožavati ili ometati saobraćaj na istoj, a naročito:

- iznositi blato ili prljati cestu bilo čime,
- na nerazvrstanu cestu i u odvodna tijela ceste dovoditi vodu i druge tekućine i ometati njihovo otjecanje,
- na kolovoz i bankine ceste, izvedenim radovima, usmjeravati vodu ili druge tekućine, blatne tokove i druga ispiranja zemljanih i drugih materijala,
- istresati ili deponovati na kolovoz, bankine, berme, rigole, cestovne jarke, objekte za odvodnju bilo kakve materijale ili tekućinu,
- napajati i napasati životinje u cestovnom pojasu,
- po nerazvrstanoj cesti vući grede, balvane, i druge teške predmete kojima bi se cesta mogla oštetiti,
- prosipati po nerazvrstanoj cesti maziva i druge masne tvari ili bilo kakve druge materijale,
- ostavljati na cesti i u cestovnom pojasu pokvarena, oštećena ili trajno napuštena vozila,
- iscrtavati i brisati horizontalnu saobraćajnu signalizaciju,
- oštećivati, premještati, zaklanjati, okretati, otuđivati vertikalnu saobraćajnu signalizaciju i cestovnu opremu,
- postavljati reklamne znakove u cestovni pojas bez saglasnosti upravitelja,
- oštećivati na bilo koji način kolovoz, bankine, berme, odvodnju ili druge elemente ceste, te zaštitne i druge ograde pored ceste,
- paliti travu, korov, građu i drugi materijal u cestovnom pojasu,
- vršiti bilo kakve radove na kosinama nasipa, zasjeka, usjeka, kanalima i objektima za odvodnju, mostovima, potpornim i drugim građevinama, kolovozu, bankinama, odvodnji i drugim elementima i opremi ceste,
- postavljati kapije ili ograde čiji se pokretni dijelovi otvaraju o pojas ceste, graditi rampe na cesti ili koje se otvaraju u pojas ceste,
- pojedinačno ili grupno izlaziti na cestu u cilju prekida saobraćaja ili fizički lično

ometati prohodnost,

- zabranjeno je bilo kakvo vraćanje cestovnog pojasa ili zauzimanje cestovnog pojasa koji je u proteklom periodu korišten kao ceste,
- zabranjeno je pokazivati granicu susjedne parcele prema cesti od strane državnog geometra, bez prisustva inspektora za ceste,
- vršiti uzurpaciju cestovnog zemljišta bilo kakvim građenjem, postavljanjem ili ograđivanjem kao i privoditi ga drugoj namjeni - poljoprivrednoj površini, sadenje drveća ili rastinja, okućnici i slično.

Član 26.

(Održavanje zemljišta uz cestu)

(1) Vlasnici zemljišta uz cestovni pojas su dužni dopustiti jednostavan odvod vode i odlaganje snijega na njihovo zemljište ako im se time ne nanosi šteta.

(2) Vlasnici zemljišta uz cestovni pojas su dužni u skladu sa ovom Odlukom i uz odštetu dozvoliti pristup cestovnim objektima radi njihovog održavanja, gradnje odvodnih jaraka i drugih uređaja za odvod vode od cestovnog pojasa do recipijenta, postavljanje privremenih ili stalnih uređaja za zaštitu ceste i saobraćaja na njoj od leda, snijega, buke, štetnih svjetlosnih utjecaja i slično ako ih nije moguće postaviti na zemljište koje je sastavni dio ceste.

(3) Vlasnici zemljišta uz cestovni pojas su dužni:

- održavati živice i zelene ograde,
- uklanjati drveće ili dijelove krošnje drveta koje ometaju, otežavaju saobraćaj ili onemogućavaju zračenje i sušenje ceste,
- uklanjati drveće ili dijelove krošnje drveta koje je dotrajalo, suho, puklo ili oštećeno, čime može ugroziti učesnike u saobraćaj,
- ugraditi betonske cijevi odgovarajućeg profila na pristupnim prijelazima preko jaraka u nivou sa cestom, odnosno ukopati cijevi na odgovarajuću dubinu, tako da se ne remeti ili omogući odvodnja ceste i da se izvedenim radovima ne usmjeravaju površinske ili druge vode na kolovoz ceste.

Član 27.

(Osiguranje preglednosti na cesti)

(1) U blizini raskršća dviju nerazvrstanih cesta ili ukrštanja nerazvrstane ceste sa željezničkom prugom u istom nivou ili na unutrašnjim stranama cestovnog zavoja i na krivinama ne smije se saditi drveće, grmlje ili visoke poljske kulture, postavljati naprave, ograde, reklamni znakovi ili drugi predmeti koji onemogućavaju preglednost na nerazvrstanoj cesti odnosno željezničkoj pruzi (trougao preglednosti).

(2) Vlasnici odnosno korisnici ili posjednici zemljišta dužni su na zahtjev upravitelja za ceste, odnosno korisnika koncesije ukloniti drveće, grmlje ili visoke poljske kulture, naprave, ograde, reklamne znakove i druge predmete radi osiguranja preglednosti na nerazvrstanoj cesti.

(3) Ako vlasnik, korisnik ili posjednik zemljišta ne postupi na način iz prethodne odredbe učinit će to pravno lice kome je povjereno održavanje nerazvrstane ceste po rješenju općinskog inspektora za ceste na teret vlasnika odnosno korisnika ili posjednika zemljišta.

(4) Potreban pojas preglednosti i prijedlog mjera za izgrađene ceste utvrđuje inspektor. Za nove ceste, pojas preglednosti se utvrđuje projektnom dokumentacijom zbog eksproprijacije.

Član 28.

(Saobraćajni znakovi i signalizacija)

(1) Saobraćajni znakovi, signalizacija i oprema nerazvrstane ceste postavlja se na osnovu Projekta saobraćajne signalizacije.

-860-

(2) Postavljanje saobraćajne i turističke signalizacije na nerazvrstanoj cesti ustupa se ovlaštenom pravnom licu na način i u skladu sa postupkom propisanim Zakonom o javnim nabavkama.

(3) Lice ili učesnik u saobraćaju koje je nanijelo štetu bilo kojem elementu ceste, signalizaciji, opremi ili objektima, dužno je da nadoknadi štetu prema cjenovniku ili ponudi izvođača radova po dostavljenom zaključku od strane inspektora za ceste, a ukoliko je pokrenut sudski postupak utvrđivanja krivice, 8 dana po pravosnažnosti sudske presude.

Član 29.

(Zabrana saobraćaja)

(1) Nadležna općinska služba u opravdanim slučajevima može rješenjem zabraniti saobraćaj motornih vozila na nerazvrstanoj cesti.

(2) Zabrana saobraćaja za sve vrste vozila na nerazvrstanoj cesti može biti samo privremena, a za pojedine vrste vozila ili vozila iznad određene granice opterećenja može biti trajna.

(3) U slučaju uvođenja zabrane na nerazvrstanoj cesti ili njenim pojedinim dijelovima moraju se odrediti alternativni pravci za odvijanje saobraćaja.

Član 30.

(Gradnja objekata u cestovnom pojasu)

Pravna i fizička lica u cilju obavljanja svoje djelatnosti mogu graditi elektronske, telefonske i komunalne objekte i instalacije, autobuska stajališta sa nadstrešnicama, parkirališta, proširenja, priključke, studenci ili javne česme, modernizacija kolovoza i postavljati reklame u cestovnom pojasu nerazvrstane ceste uz prethodnu saglasnost ili odobrenje Službe za upravu geodetskih, imovinsko-pravnih poslova i urbanizma.

Član 31.

(Priključak na nerazvrstanu cestu)

(1) Pod priključkom na nerazvrstanu cestu u smislu ove Odluke smatra se spoj nerazvrstane ceste i druge uređene površine sa koje se vozila i drugi učesnici u saobraćaju direktno uključuju u saobraćaj ili isključuju iz saobraćaja za poslovne objekte ili ceste.

(2) Priključak na nerazvrstanu cestu se može izvesti samo na osnovu odobrenja izdatog od Službe za upravu geodetskih, imovinsko-pravnih poslova i urbanizma, uz prethodno pribavljeno mišljenje inspektora za ceste.

(3) Prilaz na nerazvrstanu cestu je prilaz pojedinačnim stambenim, pomoćnim, vikend i manjim poljoprivrednim objektima te parcelama.

(4) Uz zahtjev za mišljenje potrebno je priložiti izvod iz posjedovnog lista, katastarsku skicu lokacije, situaciju, uzdužni i poprečni profil priključka ili prilaza.

(5) Inspektor za ceste rješenjem izdaje saglasnost i uslove izgradnje prilaza.

(6) Troškove izgradnje priključka ili prilaza na nerazvrstanu cestu u skladu sa projektom saobraćajnog priključka ili projektom dokumentacijom prilaza i izdatim odobrenjem snosi investitor priključka ili prilaza.

Član 32.

(Izdavanje odobrenja za priključak)

(1) Općinski načelnik putem Službe za upravu ekonomskih poslova i poduzetništva izdaje:

- odobrenje za priključak na nerazvrstanu cestu,
- odobrenje za postavljanje reklama u cestovnom pojasu nerazvrstane ceste,
- odobrenje za prekomjernu upotrebu nerazvrstane ceste,
- odobrenje za korištenje cestovnog zemljišta nerazvrstane ceste,

-861-

- odobrenje za privremenu izmjenu režima saobraćaja na nerazvrstanoj cesti.

(2) Općinski načelnik putem Službe za geodetske, imovinsko-pravne poslove i urbanizam izdaje-odobrenje za izgradnju objekata i instalacija unutar cestovnog pojasa i zaštitnog pojasa nerazvrstane ceste.

Član 33.**(Zaštitni pojas)**

(1) Zaštitni pojas nerazvrstane ceste je pojas na kome važi poseban režim gradnje i uspostavlja se sa ciljem zaštite nerazvrstane ceste i sigurnosti saobraćaja na istoj od štetnih uticaja i različitih aktivnosti u prostoru pored nerazvrstane ceste.

(2) Zaštitni pojas nerazvrstane ceste u smislu stava 1. ovog člana unutar kojeg se ne mogu graditi stambene i poslovne zgrade, bunari, rezervoari i septičke jame iznosi 5 m od vanjske ivice cestovnog pojasa.

Član 34.**(Naknada za korištenje cestovnog zemljišta)**

(1) Pravna i fizička lica za korištenje cestovnog zemljišta nerazvrstanih cesta u slučajevima iz člana 30. ove Odluke obavezna su plaćati naknadu.

(2) Naknada za korištenje cestovnog zemljišta nerazvrstanih cesta utvrđuje se ovom Odlukom i plaća unaprijed u jednokratnom iznosu.

Član 35.**(Visina naknade)**

(1) Visina naknade za korištenje cestovnog zemljišta nerazvrstanih cesta obračunava se po m² na godišnjem nivou i iznosi:

1. za benzinske stanice, hotele, motele, ostale ugostiteljske objekte, autoservise i druge poslovne i proizvodne objekte 2,00 KM/m².

2. stambeni objekti ne podliježu plaćanju naknade za korištenje cestovnog zemljišta nerazvrstane ceste.

(2) Visina naknade za korištenje cestovnog zemljišta nerazvrstanih cesta obračunava se po m¹ na godišnjem nivou i iznosi:

1. za infrastrukturne vodove (telekomunikacijske i elektronske kablove i sl.) 0,75 KM/m¹.

(3) Visina naknade za korištenje cestovnog zemljišta nerazvrstanih cesta za postavljanje reklame obračunava se po m² na godišnjem nivou i iznosi:

1. jednostrana reklama neosvijetljena 10,00 KM/m²,

2. jednostrana reklama osvijetljena 20,00 KM/m²,

3. dvostrana reklama neosvijetljena 15,00 KM/m²,

4. dvostrana reklama osvijetljena 30,00 KM/m².

(4) Visina naknade za prekomjernu upotrebu nerazvrstane ceste utvrđuje se na osnovu Elaborata o procjeni oštećenja koje će prekomjerna upotreba nerazvrstanih cesta prouzrokovati.

(5) Elaborat o procjeni oštećenja o prekomjernoj upotrebi nerazvrstane ceste izrađuje stručno lice o trošku podnosioca zahtjeva.

(6) Naknada po rješenju iz stava 1. i 2. ovog člana obračunava se od dana donošenja rješenja do 31.12. tekuće godine, a za svaku narednu godinu korištenja cestovnog zemljišta donosi se novo rješenje u kojem je obračunski period od dana 01.01. do 31.12. odnosne godine.

(7) Naknada po rješenju iz stava 3. ovog člana obračunava se za vremenski period odobrenog korištenja cestovnog zemljišta.

(8) Površina cestovnog zemljišta se utvrđuje mjerenjem na licu mjesta ili iz projekta izvedenog stanja, a dužina ugrađenih infrastrukturnih vodova na osnovu projekta izvedenog stanja ili geodetskog snimka podzemnih instalacija ili direktnim mjerenjem manjih dužina.

-862-

Član 36.

(Administrativni troškovi)

Pored naknada koje su korisnici dužni plaćati u skladu sa prethodnim članom ove Odluke, podnosioci zahtjeva plaćaju i administrativne troškove postupka za donošenje rješenja i to:

1. naknada za davanje saglasnosti, odnosno odobrenja za lokaciju i izgradnju objekata, benzinske stanice i ugostiteljskih objekata sa priključkom na nerazvrstanu cestu iznosi 200,00 KM,

2. naknada za davanje saglasnosti, odnosno odobrenja za polaganje infrastrukturnih vodova (telekomunikacijske instalacije elektroinstalacije i sl.) kroz trup ceste i cestovni pojas nerazvrstane ceste iznosi 100,00 KM,

3. naknada za davanje saglasnosti, odnosno odobrenja za postavljanje reklama u cestovnom pojasu nerazvrstane ceste iznosi 50,00 KM,

4. naknada za davanje saglasnosti, odnosno odobrenja za izgradnju prilaza na nerazvrstanu cestu iznosi 50,00 KM,

5. naknada za davanje odobrenja za prekomjernu upotrebu nerazvrstane ceste iznosi 40,00 KM.

VI - FINANSIRANJE NERAZVRSTANIH CESTA**Član 37.**

(Finansijska sredstva)

Finansijska sredstva za održavanje, zaštitu, obnovu, rekonstrukciju i izgradnju nerazvrstanih cesta osiguravaju se :

a) iz javnih prihoda:

- naknada za nerazvrstane ceste koje se plaćaju za prekomjernu upotrebu ceste zbog opterećenja i učestalosti vozila,
- naknada za korištenje cestovnog zemljišta ili od reklamnih znakova,
- ostalih naknada,

b) kreditima

c) donacijama / grantovima:

- iz sredstava federalnog budžeta, budžeta kantona, te budžeta općine,
- donacijama drugih donatora.

VII - INSPEKCIJSKI NADZOR**Član 38.**

(Poslovi inspekcijaskog nadzora)

(1) Poslove inspekcijaskog nadzora nad provođenjem ove Odluke vrši općinski inspektor za ceste.

(2) Općinski inspektor za ceste, vršeći inspekcijaski nadzor ima slijedeća prava i dužnosti:

1. pregledati stanje cesta,
2. pregledati radove na izgradnji, rekonstrukciji, sanaciji, održavanju i zaštiti nerazvrstanih cesta,
3. pregledati radove i radnje koji se obavljaju na cesti u zaštitnom i cestovnom pojasu nerazvrstanih cesta,
4. pregledati tehničku dokumentaciju u vezi sa radovima iz prethodnih tački 2. i 3. (dozvole, saglasnosti, projekti, standardi),
5. pregledati planove, programe, ugovore i ostalu dokumentaciju koja se odnosi na održavanje i zaštitu nerazvrstanih cesta,

6. pregledati provođenje mjere za osiguranje nerazvrstanih cesta i saobraćaja na njima,
7. pregledati provođenje propisanih uvjeta za obavljanje zahvata u cestovnom i zaštitnom pojasu nerazvrstanih cesta,

8. pregledati obavljanje upravnih i stručno-tehničkih poslova na nerazvrstanim cestama,

9. izmjeriti širinu pojasa ceste na terenu, te uporediti sa katastarski uplanjenom širinom. U slučaju nemogućnosti tačnog utvrđivanja širine pojasa ceste, isto će izvršiti geometar nadležne službe na osnovu zahtjeva inspektora.

(3) Općinski inspektor za ceste, vršeći inspekcijski nadzor, ima pravo:

1. pregledati objekte, uređaje, materijale, dokumentaciju preduzeća i upravnih organizacija koje upravljaju cestama, kao i izvođača na gradnji, rekonstrukciji ili održavanju cesta,

2. saslušati stranke i svjedoke primjenom pravila upravnog postupka,

3. uzeti uzorke materijala, te obavljati druge poslove koji su u skladu sa namjenom inspekcijskog nadzora.

(4) Vršeći inspekcijski nadzor, općinski inspektor za ceste ima pravo narediti:

1. obustavu radova koji se izvode na nerazvrstanim cestama, u cestovnom ili zaštitnom pojasu, suprotno odredbama ove Odluke, tehničkim propisima, standardima i normativima, te dati rok za otklanjanje nedostataka,

2. otklanjanje nedostataka na nerazvrstanim cestama koji ugrožavaju sigurnost saobraćaja na njima,

3. privremenu zabranu odvijanja saobraćaja na nerazvrstanim cestama ili njihovom dijelu, ako utvrdi da se na njima ne može sigurno odvijati saobraćaj, te narediti da se odmah poduzmu mjere za osiguranje saobraćaja,

4. obustavu saobraćaja cestovnim motornim vozilima koja zbog svojih tehničkih svojstava ili načina na koji saobraćaju mogu nanijeti štetu nerazvrstanim cestama ili njenom dijelu i kada je njihov saobraćaj na cesti u suprotnosti sa zakonom i drugim propisima,

5. isključenje cestovnog motornog vozila iz saobraćaja na nerazvrstanoj cesti kada utvrdi da dimenzije i ukupna masa ili njegovo osovinsko opterećenje prelazi veličine iz člana 56. Zakona o cestama FBiH, a prijevoznik nema odgovarajuću dozvolu za vanredni prevoz,

6. privremenu zabranu saobraćaja na novoizgrađenoj i rekonstruiranoj nerazvrstanoj cesti, njenom dijelu ili objektu na njoj, ako utvrdi da sa gledišta sigurnosti saobraćaja ne ispunjava tehničke uslove,

7. rušenje građevine ili njenih dijelova i drugih objekata na teret investitora, kao i uspostavljanje prvobitnog stanja, ako su izgrađene ili se grade na nerazvrstanoj cesti ili cestovnom pojasu bez odobrenja ili saglasnosti ili suprotno uvjetima iz odobrenja, odnosno saglasnosti nadležnog organa,

8. uklanjanje bilo kakvih izvedenih radova, predmeta, materijala, tekućina, drveća, grana ili rastinja, ograda, kolaca, kapija, iz cestovnog pojasa.

9. otkloniti učinjeno bilo koje oštećenje na kolovozu, elementima i trupu ceste, objektima, signalizaciji, pojasu ceste te vraćanje u prvobitno stanje.

10. uklanjanje reklamnih znakova u cestovnom i zaštitnom pojasu postavljenih bez odobrenja ili suprotno uslovima iz odobrenja nadležnog organa,

11. u nužnim slučajevima, kada bi bila ugrožena sigurnost saobraćaja na nerazvrstanoj cesti ili bi mogla nastati šteta na njoj, odrediti privremene mjere kako bi se otklonila opasnost ili spriječila šteta,

12. odobriti postavljanje ili uklanjanje saobraćajne signalizacije te izvođenje radova redovnog održavanja o trošku podnosioca zahtjeva, angažovanjem pravnog lica za održavanje ceste,

13. da se u polju preglednosti otklone nedostaci i nepravilnosti prouzrokovane

kršenjem propisanih mjera za osiguranje preglednosti nerazvrstane ceste,

14. narediti uklanjanje nedostataka i vraćanje u prvobitno stanje, koji na bilo koji način zauzimaju cestovni pojas suprotno odredbama zaštite ceste,

15. narediti privremenu zabranu provođenja plana, odobrenja, zaključaka, ugovora, saglasnosti, odluka, naredbi i slično, (akata) vezanih za održavanje i zaštitu cesta, a koji su u suprotnosti sa odredbama ove Odluke.

16. poduzimanje i drugih mjera u skladu sa važećim propisima.

(5) Općinski inspektor za ceste je dužan bez odlaganja podnijeti zahtjev za pokretanje prekršajnog postupka, ako u vršenju nadzora utvrdi da je počinjen prekršaj iz ove Odluke.

Član 39.

(Omogućavanje inspeksijskog nadzora)

(1) Pravna i fizička lica kod kojih se vrši inspeksijski nadzor dužna su omogućiti rad inspektoru, pružiti potrebnu pomoć i na njegovo traženje u određenom roku dostaviti podatke i dokumentaciju za vršenje inspeksijskog nadzora.

(2) Izjavljena žalba na rješenje ili zaključak inspektora ne odlaže njegovo izvršenje.

(3) U slučaju potrebe, kada je ugrožena bezbjednost učesnika u saobraćaju, ljudi i okoline, inspektor može narediti usmeno ili zapisnikom potrebnu mjeru, o čemu se donosi rješenje u roku od tri dana. Rok izvršenja traje od vremena izricanja naredbe.

VIII - KAZNE NE ODREDBE

Član 40.

(Vrste prekršaja i visina kazne)

(1) Za prekršaje utvrđene u ovoj Odluci kaznit će se počinitelac ako:

1. vrši izgradnju ceste bez odobrenja za građenje (član 8. stav 1.),

2. vrši izgradnju ili rekonstrukciju ceste sa nepotpunom tehničkom dokumentacijom

(član 8. stav 3.),

3. ne izmjesti ili ne prilagodi instalacije nastalim promjenama u roku (član 12.),

4. ne pridržava se ugovorenih ili odobrenih obaveza i uslova (član 16. stav 4.),

5. izvoditi radove redovnog održavanja bez prethodnog obavještenja inspektora za ceste

(član 16. stav 5.),

6. ne osigura trajno, neprekidno i kvalitetno održavanje i zaštitu cesta ili ne zaključi ugovor o održavanju cesta u skladu sa odredbama člana 19. ove Odluke,

7. radove izvodi suprotno zaključenom ugovoru (član 19. stav 2),

8. ne vrši održavanje revizijskih okana komunalnih instalacija i svih vrsta uređaja postavljenih unutar cestovnog pojasa propisano članom 20. ove Odluke,

9. ne održava revizijska okna i instalacije iz člana 20. ove Odluke,

10. prekomjerno koristi nerazvrstanu cestu suprotno članu 23. ove Odluke,

11. ne postavi ogradu na dijelu prostora gdje se okuplja veći broj ljudi ili na zemljištu na kojem se redovno zadržavaju životinje, a koji se protežu uz nerazvrstanu cestu (član 24.),

12. ne poštuje zabrane propisane članom 25. ove Odluke,

13. ne poštuje odredbe propisane članom 26. ove Odluke,

14. sadi drveće, grmlje ili visoke poljske kulture, postavlja naprave, ograde, reklamne znakove ili druge predmete koji onemogućavaju preglednost na cestu (trougao preglednosti) u blizini ukrštanja dviju cesta u nivou ili ukrštanja cesta sa željezničkom prugom u nivou ili na unutrašnjim stranama cestovnog zavoja (član 27.),

15. saobraćajne znakove, signalizacija i oprema nerazvrstane ceste postavlja i uklanja bez Projekta saobraćajne signalizacije ili bez rješenja inspektora za ceste (član 28. stav 1.),

16. ne nadoknadi nanesenu štetu u datom roku prema članu 28. stav 3. ove Odluke,

17. gradi ili obavlja djelatnost bez prethodne saglasnosti ili odobrenja Službe za upravu geodetskih, imovinsko-pravnih poslova i urbanizma (član 30.),

18. gradi priključak ili prilaz bez odobrenja i mišljenja ili saglasnosti inspektora za ceste (član 31.),

19. bez saglasnosti upravitelja izvrši ili odobri izgradnju instalacija ili građevina (član 33. stav 2.),

20. krši građenje ili izvođenje radova u zaštitnom pojasu suprotno članu 33. stav 3. ove Odluke,

21. koristi cestovno zemljište bez plaćanja naknade propisane članom 34. ove Odluke,

22. ne omogući vršenje inspekcijskog nadzora i ne pruži pomoć pri vršenju inspekcijskog nadzora (član 39.),

23. ne postupi po rješenju ili zaključku inspektora u datom roku.

(2) Novčanom kaznom u iznosu od 500,00 KM do 5.000,00 KM kaznit će se pravno lice, a u iznosu od 100,00 KM do 500,00 KM odgovorno lice u pravnom licu za radnje koje imaju obilježja prekršaja.

(3) Novčanom kaznom u iznosu od 200,00 KM do 2.000,00 KM kaznit će se pojedinac koji samostalno obavlja djelatnost ličnim radom (samostalni privrednik, obrtnik).

(4) Novčanom kaznom u iznosu od 100 KM do 500,00 KM kaznit će se fizičko lice.

IX - PRELAZNE I ZAVRŠNE ODREDBE

Član 41.

(Spisak nerazvrstanih cesta)

(1) Općinski načelnik će na prijedlog Službe za upravu ekonomskih poslova i poduzetništva u roku od 60 dana od dana stupanja na snagu ove Odluke utvrditi spisak nerazvrstanih cesta na području općine Zavidovići.

(2) Spisak iz prethodnog stava objavit će se u „Službenom glasniku Općine Zavidovići“.

Član 42.

(Prestanak važenja Odluke o nekategorisanim cestama)

Stupanjem na snagu ove Odluke prestaje da važi Odluka o nekategorisanim cestama („Službeni glasnik Općine Zavidovići“, broj: 3/2002).

Član 43.

(Stupanje na snagu)

Ova Odluka stupa na snagu osmog dana od dana objavljivanja u „Službenom glasniku Općine Zavidovići“.

**PREDSJEDAVAJUĆI
OPĆINSKOG VIJEĆA**

(M.P.)

Redžo Seferović, s.r.

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI
GRADSKO VIJEĆE



Komisija za Statut i propise

Broj: 01-04-2174/25-AP-2

Datum: 22.10.2025. godine

Na osnovu člana 13, 17. i 18. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022) i člana 33. i 44. Poslovnika o radu Gradskog vijeća Zavidovići – novi prečišćeni tekst („Službeni glasnik grada Zavidovići“, broj: 7/22 i 1/23), Komisija za Statut i propise na 14. sjednici održanoj dana 22.10.2025. godine, razmatrala je Prijedlog Odluke o izmjenama Odluke o nerazvrstanim cestama na području općine Zavidovići, pa nakon rasprave donijela

ZAKLJUČAK

1. Komisija za Statut i propise smatra da je Prijedlog Odluke o izmjenama Odluke o nerazvrstanim cestama na području općine Zavidovići, u skladu sa zakonom i drugim propisima.

2. Komisija za Statut i propise smatra da je Prijedlog Odluke o izmjenama Odluke o nerazvrstanim cestama na području općine Zavidovići, pripremljen u skladu sa članom 13. stav (2) Zakona o principima lokalne samouprave u Federaciji Bosne i Hercegovine („Službene novine Federacije BiH“, broj. 49/06 i 51/09), člana 2. stav (2), člana 4. stav (1) i (2) Zakona o cestama Federacije Bosne i Hercegovine („Službene novine Federacije BiH“, broj: 12/10, 16/10 i 66/13) i člana 10. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022).

3. Komisija za Statut i propise smatra da je Prijedlog Odluke o davanju na korištenje poslovnih prostorija u vlasništvu Grada Zavidovići Javnoj ustanovi „Kulturno-sportski centar“ Zavidovići, pripremljen u skladu sa Jedinstvenim pravilima za izradu pravnih propisa u Zeničko-dobojskom kantonu („Službene novine Zeničko-dobojskog kantona“, broj: 5/08).

4. Prijedlog Odluke o davanju na korištenje poslovnih prostorija u vlasništvu Grada Zavidovići Javnoj ustanovi „Kulturno-sportski centar“ Zavidovići dostavlja se predsjedavajućoj radi uvrštavanja u dnevni red sjednice Gradskog vijeća.

5. O realizaciji ovog zaključka starat će se Stručna služba Gradskog vijeća.

PREDSJEDNICA KOMISIJE
ZA STATUT I PROPISE

mr. iur. Dženana Memagić

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI
GRADSKO VIJEĆE



**Komisija za budžet, finansije i
ekonomska pitanja**

Broj: 01-04-2174/25-AP-3

Datum: 21.10.2025. godine

Na osnovu člana 13., 17. i 18. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022), člana 33. i 45. Poslovnika o radu Gradskog vijeća Zavidovići – novi prečišćeni tekst („Službeni glasnik Grada Zavidovići“, broj: 7/22 i 1/23), Komisija za budžet, finansije i ekonomska pitanja na 11. sjednici održanoj dana 21.10.2025. godine, razmatrala je Prijedlog Odluke o izmjenama Odluke o nerazvrstanim cestama na području općine Zavidovići, pa nakon rasprave donijela

ZAKLJUČAK

1. Komisija za budžet, finansije i ekonomska pitanja prihvata Prijedlog Odluke o izmjenama Odluke o nerazvrstanim cestama na području općine Zavidovići.

2. Prijedlog Odluke o izmjenama Odluke o nerazvrstanim cestama na području općine Zavidovići, dostavlja se predsjedavajućoj radi uvrštavanja u dnevni red sjednice Gradskog vijeća.

3. O realizaciji ovog Zaključka starat će se Stručna služba Gradskog vijeća.

PREDSJEDNIK KOMISIJE

Dino Starčević, dipl. ecc.



BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI
GRADSKO VIJEĆE



**Komisija za prostorno planiranje,
uređenje i ekologiju**

Broj: 01-04-2174/25-AP-4

Datum: 21.10.2025. godine

Na osnovu člana 16. i 17. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022), člana 33. i 45. Poslovnika o radu Gradskog vijeća Zavidovići – novi prečišćeni tekst („Službeni glasnik Grada Zavidovići“, broj: 7/22 i 1/23), Komisija za prostorno planiranje, uređenje i ekologiju na 9. sjednici održanoj dana 21.10.2025. godine, razmatrala je Prijedlog Odluke o izmjenama Odluke o nerazvrstanim cestama na području općine Zavidovići, pa nakon rasprave donijela

ZAKLJUČAK

1. Komisija za prostorno planiranje, uređenje i ekologiju prihvata Prijedlog Odluke o izmjenama Odluke o nerazvrstanim cestama na području općine Zavidovići.
2. Prijedlog Odluke o izmjenama Odluke o nerazvrstanim cestama na području općine Zavidovići, dostavlja se predsjedavajućoj radi uvrštavanja u dnevni red sjednice Gradskog vijeća Zavidovići.
3. O realizaciji ovog zaključka starat će se Stručna služba Gradskog vijeća.

PREDSJEDNIK KOMISIJE

Almir Muratović, dopl. ing. građ.

